

XXVII. IGANDEA URTEAN ZEHAR (A)

Otoitza

Jainko ahalguztidun betierekoa,
neurrigabea izanik zeure maitasuna,
guk merezi eta uste dugun baino gehiago
betetzen dituzu gure eskariak;
isur ezazu gure gainera zeure errukia,
gaiztakeria guztietatik garbi gaitzazun
eta eskatzera ausartzen ez garena ere eman diezaguzun.
Zure Seme Jesu Kristo.

I. IRAKURGAIA: Is 5, 1-7

Israel etxea da diren guztien Jaunaren mahastia.

Isaias Profetaren liburutik

Nire adiskidearen izenean nator kantari,
maite kantu bat haren mahastiari.
Bazuen mahasti bat nire adiskideak,
mendi hegal gizenean.
Aitzurtu zuen, harriak bildu,
eta landare aukeratuak sartu.
Dorrea eraiki zuen erdi-erdian
eta dolarea jarri.
Mahats ona itxaron zuen,
eta basa-mahatsa eman zion.
Orain, Jerusalem bizi zaretenok
eta Judako gizakiok,
izan zaitezte zuek epaile,
nik eta nire mahastiak dugun auzian.
Zer da nire mahastiarentzat egin ahal izan,
eta egin ez dudanik?
Zergatik, mahats ona itxaron izanik,
hark basa-mahatsa eman zidan?
Orain, beraz, jakinaraziko dizuet nik,
zer egingo diodan nire mahastiari:
Hesia kenduko diot,
larre-soro izan dadin;
inguruko horma botako diot,
hankapean ibilia izan dadin.
Eremu bihurtuko dut,
eta ez dute, ez inausiko, ez jorratuko;
sasi eta larrek hartuko dute.
Eta hodeiei aginduko diet,
euririk ez dezatela egin haren gainera.
Horra, bada: Israel etxea da

diren guztien Jaunaren mahastia;
 Judako gizakiak dira
 hango landare aukeratuak.
 Jaunak zuzentasuna itxaron zuen,
 eta horra, odol isurketak;
 zuzenbidea itxaron,
 eta horra, garrasi hotsak.

ERANTZUN SALMOA: Sal 79, 9 eta 12. 13-14. 15-16. 19-20

R/. Jaunaren mahastia Israelgo etxea da.

Egiptotik mahatsondo bat atera zenuen,
 atzerriak iraitzirik landatu zenuen.
 Zabaldu ditu adarrak itsasoraino,
 eta muskilak Ibaraino. R/.

Inguruko horma zergatik diozu suntsitu,
 bidez doazen guztiek dezaten murriztu?
 Basurdeek lardaska dezaten,
 basa pistiek jan dezaten? R/.

Itzul zakizkigu, gudari-taldeen Jainko,
 begira zerutik, ikus, mahatsondo honi ager zakizkio:
 zeure eskuz landatu duzun aldaska honi,
 Zeuk indartu duzun landareari. R/.

Ez gara Zugandik urrunduko,
 gauzkazu bizirik eta zure izena dugu deituko.
 Jauna, gudari-taldeen Jainkoa, bizbiztu gaitzazu;
 salba gaitezen, zeure begia leun ager ezazu. R/.

II. IRAKURGAIA: Flp 4, 6-9

Bakearen Jaungoikoa zuekin izango da.

San Paulo Apostoluak Filipotarrei

Senideok: Ez eduki ezeren kezkarik; baizik eta beti eta beti zuen esker onezko otoitz eta eskarietan agertu zeuen eskabideak Jaungoikoari. Eta gogoeta guztiak baino handiagoa den Jaungoikoaren bakeak, gordeko ditu zuen bihotzak eta zuen gogapenak Kristo Jesusi lotuak. Gainerakoan, ene senideok, aintzakotzat hartazue, egiazko, jator, zuzen, garbi, maitagarri, izen oneko den guztia; hartu aintzakotzat onbidetsu edota goragarri den guztia. Egizue, niregandik ikasi eta hartutakoa, niregandik entzun eta ikusitakoa. Eta bakearen Jaungoikoa zuekin izango da.

EBANJELIOA: Mt 21, 33-43

Aleluia: Ik. Jn 15, 16

R/. Aleluia.
 V/. Nik aukeratu zaituztet mundutik,
 joan zaitezten eta fruitu eman dezazuen,
 eta zuen fruituak iraun dezan –dio Jaunak–. R/.

Beste nekazari batzuei utziko die mahastia.

Jesu Kristoren Ebanjelioa San Mateoren liburutik

Aldi hartan, Jesusek honela esan zien apaiz nagusiei eta herriko zaharrei: «Entzun ezazue parabola hau: Bazen etxeko jaun bat; eta mahasti bat landatu zuen, hesiz inguratu, bertan dolare bat egin eta dorre bat eraiki zuen; eta nekazari batzuri eman zien errentan eta bera urrutira joan zen.

Mahats garaia etorri zenean, bere morroiak bidali zituen nekazariengana, zegozkion hartzekoak jasotzera. Nekazariak, ordea, morroiei heldu, eta bata jo, bestea hil egin zuten, eta hirugarrenari harrika eman zioten. Berrito beste morroi batzuk bidali zituen, lehen baino gehiago; eta haiekin ere berdin egin zuten. Azkenean bere semea bidali zien, bere baitarako esanez: "Izango diote begirune nire semeari".

Nekazariak, ordea, semea ikusita, honela zioten elkarri: "Hori da oinordeakoa; goazen eta hil dezagun, eta geuretzat izango da ondarea". Heldu zioten, mahastitik kanpora bota, eta hil egin zuten. Mahasti jabeak, datorrenean, zer egingo die nekazari horiei?»

Erantzun zioten: «Gaizto horiei heriotza gaiztoa emango die; eta bere garaian ordainak emango dizkioten beste nekazari batzuri utziko die mahastia».

Jesusek esaten die: «Ez al duzue Liburu Santuan behinere irakurri:

"Etxegileek baztertutako harria

berori gertatu da giltzarria.

Jaunak egin du hori,

gure begien harrigarri?"

Horregatik diotsuet Nik: Jaungoikoaren erreinua zuei kendu egingo zaizue, eta uzta ekarraraziko dion beste herri bati emango zaio».

Oparigaien gainekoa

Onar, Jauna,

zeure aginduz egiten dizugun oparia;

eta, Zu goresteke ospatzen dugun Eukaristia honen bidez,

santu egin gaitzazu eta emaguzu zeure salbamena.

Jesu Kristo.

Jaunartze ondorengoa

Jainko ahalguztiduna,

ogi-ardo hauetan hartu ditugun Kristoren gorputz-odolek

Beraren irudiko egin gaitzatela.

Jesu Kristo.